

河
防
疏
略

河防疏畧卷之十五

義烏朱之錫梅麓甫著

闕里屬員孔貞來元起訂
稽山後學徐 沁埜公輯

特叅抗玩有司疏

題爲特叅抗玩有司以儆效尤以濟急公事案准工
部覆臣題爲黃水陡漲衝埽侵堤萬分危急事一
疏內開應請

勅臣嚴飭各官照例量協夫車採運柳料速行堵築如
有各官怠玩違誤卽行指名

題叅以憑從重議處等因奉

旨依議行欽遵通飭在案查石香爐一工臣專駐督催漸有成緒不期秋水異漲極力套護兩壩僅全急溜深洪較前加倍應添柳料除覓屬附近州縣外其餘道路稍遠車運艱難不得已於隣省接壤州縣採運濟急而道廳各官估探決口尚須捲下大埽三百有餘時日迫促卽日下二埽猶恐歲終不能底績奈在工之夫除搬運柳草芟繩樁搬各項雜役煩多推埽壓土日不暇給且乘此水定議挑

引河特行兗州府於兗屬未派運柳州縣調夫協濟不意催提將近一月杳無一夫到工而滕縣知縣李含葢計遣奸里王化遠投呈求免臣已量加責飭該縣又復抗申堅執一夫不出若人人效尤則決工停延無時得竣轉盼桃汛雖百倍人力猶恐未易收拾也除仍嚴飭該府勒限催解倘有違玩續疏

題叅所有該縣抗誤急工緣由相應特叅伏乞勅部從重議處施行

康熙元年十月
日題十一月初一日奉

旨李含蓋着從重議處具奏該部知道

酌估曹工疏

題爲決工水勢倍劇物力措處維艱請祈速賜酌估
以無誤堵塞事據兗西道魏紹芳呈據署兗州府
黃河同知事單縣知縣韓第呈據曹縣申准管河
主簿陳方牒稱石香爐黃河大溜改徙北流衝潰
新月堤初計止寬十八丈彼時星夜督夫採辦埽
料極力堵禦工程將竣不期五月十五日水長衝
刷漸濶漸深退後裹頭屢被衝失爾時相度大勢
約估大柳一百六十萬中椿芟纜草束留概隨採

隨用大椿木榦蔴用價辦買其柳束已蒙總河部
院分派兗屬勸諭輸運除捲護合壩外一面於七
月十五日興工至八月十二日兩壩共下過埽工
六十餘丈謂可計日成工不意八月內秋水暴發
洶湧異常一切物料已下之埽復被墊陷將到工
柳草幾爲漂沒東西築成壩臺又費套墊實計水
口尚有九十六丈較之六月深更兩倍需料愈多
伏乞轉詳請加物料以便僨工等情到縣准此該
本縣覆勘無異相應申詳等情到職據此該卑職

查得曹縣石香爐決口前於五月初間始決之際
僅寬一十八丈蒙總河部院同本道并前任倪同
知晝夜堵塞止剩龍門八丈未經塞合忽於五月
十五十六兩日黃水復漲較前倍甚口愈掃而愈
寬底愈刷而愈深極力搶救西壩幸而保固然日
日套壘廂埽未嘗停手至東壩屢經退後裹護無
奈水勢滔天漲發不定彼時就近採用柳二十餘
萬隨下隨被衝激壘隔一時智巧俱困人力難施
一面調夫修築月堤一面採辦物料相機興舉隨

蒙總河部院酌派曹縣柳三十萬束曹州柳二十萬束單縣柳二十萬束定陶縣柳六萬五千束城武縣柳三萬束又慮不足敷用復行兗州府除派過五州縣外於未派二十二州縣共派採柳八十八萬通共柳一百五十九萬五千束其草芟中樁留楸野草爲數不貲俱撥夫採辦調車起運不計錢糧止大椿本地附近不產勢必取諸西河又葦蔴需用甚多非同柳枝荒草隨地可採不得不酌行買辦二



分派嚴行催解至七月初間蒙總河部

院同本道率領職等逐一探測水勢少平人力可施且意今夏伏水洪大加倍往年秋水斷無甚於伏水之理又蒙總河部院逐廠查勘各州縣所解柳束已到工者六十餘萬椿橛草芟等料雖未如數察審河勢似足接濟復念兗州府所派各州縣柳八十萬道路太遠車運甚難不能濟急行令免解惟鉅野縣柳梢尚多且去工附近派採六萬又於附近河南商丘縣勸諭協採柳十五萬約畧足用隨示在工各官於十五日催工堵築次第進埽

不意八月十五日河水驟長又兼十七十八以至
二十七日雷雨如注大河白浪滔天風狂漾湧其
汪洋澎湃之勢較五月再漲之水更數倍矣蒙總
河部院躬親指揮本道率領卑職等冒雨衝風督
夫搶護相機套壓兩壩於萬難救護之中幸保無
虞更所苦者大溜盡注東壩危在頂衝且回流倒
刷甚急又將東壩廢堤頭盡數衝坍全河傾瀉不
但堵塞決口而東壩又生數十丈頂衝之工此時
若不速加套護則從前之工俱棄東壩一去西壩

亦屬廢工故不得不於廢堤頭日夜套埽然所辦
塞决之柳尚虞不足奚堪當正壩之外又費如許
物料乎至今尚日有蟄陷竟無底止東壩並廢堤
頭共下過正面廂邊肚套埽一百三十四箇計工
長二十三丈西壩下過正面廂邊肚套埽一百零
一箇計工長四十一丈共下過埽二百三十五箇
共用過柳二十五萬五千一百五十三束并本地
椿檁芟草俱不計錢糧又前後通共調曹州曹縣
單縣並兗州府運河廳捕河廳東昌府河務廳江

南徐屬廳額募夫共一萬一千六百一十四名晝
夜搶救堵築西壩及加幫修築月堤自五月起至
九月止除停工不計外共用工一百五十日俱不
計錢糧若照漕規計筭節省已數萬金止用過價
買西河大椿一百六十四根綠蔴十二萬七千零
六十三觔是皆總河部院及本道多方督催各屬
急公恐後而職等仰體焦勞雖晝夜拮据艱苦備
經亦皆職分當爲無容瑣瑣自述也現今決口九
十六丈自經大水之後內少淺者二三丈深者甚

有四五丈不等而五丈之下尚屬淤陷竊龍門愈
窄水勢愈急今之五丈深者臨期又未知淺深若
何也且東壩蟄陷無休壩後回溜又急是塞決之
物料或尚可程而護壩之物料更自難定也今卑
職隨同總河部院暨本道并曹縣知縣陳澄心主
簿陳方就現前決口估計共寬九十六丈內深水
約計應用長八丈高一丈五尺四埽出水者長四
十丈稍深水約計應用長八丈高一丈三埽出水
者五十六丈連廂邊共用沉水埽三百五十四箇

并廂護廢堤頭連前下埽用過通共該大柳一百七十二萬七千一百五十三束內除前派過採運柳一百萬零五千尚欠柳七十二萬二千一百五十三束因查嘉祥鄆城二縣猶在三百里內且境內柳梢尚多解運猶易相應於嘉祥縣量採運柳三萬鄆城縣採運柳五萬又蒙總河部院於附近江南省屬豐碭二縣派採柳共九萬又河南省屬夏虞儀考四縣共派採運柳十四萬現在檄催採運陸續交工共計派過柳一百三十一萬五千束

尚少柳四十一萬二千一百五十三束草九十三萬九千五百六十一束芟十五萬八千四百二十一套椿二千五百一十根留樛六千一百三十四根繇藤五十四萬九千八百八十三觔以上除柳梢芟草本地大中次中椿留樛俱係採辦不計錢糧並本省運柳不給運脚外內有隣省協採柳三十八萬雖莫非

王事而事屬隔省解運未免稱苦倘催呼不前無以責成今議每束量給脚價銀一分五釐共該銀五

千七百兩西河大椿木五百九十六根每根價銀
三錢共該銀一百七十八兩八錢餘麻五十四萬
九千八百八十三觔每觔量給價銀一分五釐共
該銀八千二百四十八兩二錢四分五釐以上運
脚椿榦價值共銀一萬四千一百二十七兩零四
分五釐至於尚少柳四十一萬二千一百五十三
束查附近州縣柳梢俱已採盡委難再派其河南
各工歲修物料時值報銷或有厥存餘剩仰懇轉
詳總河部院酌查借調覓船起運塞決完日造冊

彙銷倘仍不足另議派調再查在工夫役或出自
地畝或酌調額夫俱有本等工食不計錢糧所有
樁埽夫晝夜用工良屬苦役雖未可循照別工事
例亦應量給工食查樁夫一百名每名日給工食
銀一錢計三箇月完工該銀九百兩埽夫一百一
十七名每名日給工食銀七分計三箇月完工該
銀七百二十七兩一錢樁埽夫工食共銀一千六
百二十七兩一錢以上運腳樁檣價值并樁埽夫
工食通共銀一萬五千七百六十四兩一錢四分

五釐伏乞本道速賜轉詳總河部院候一面確覈具

題一面批允動支曹庫銀兩分派置買椿櫟運脚并給樁埽夫食用庶事有責成夫料畢集而決工可計日告成矣卑職更有請者各屬未完并新估派借柳束若果爾急公於十一月內齊到工所塞口可以刻期告竣如怠玩愆期恐來歲二月解凍水發龍門未合又不得不停工以待深有所未便也至謀事固存乎人而天時原不可測時當冬令倘

遇陰雨連綿風雪交加船車難前用工維艱又非
卑職所敢預定也擬合呈詳等情具詳到道據此
該本道看得曹縣石香爐始決一十八丈隨即督
催採柳捲堵止剩龍門八丈忽於五月十五六日
水復驟發衝沒東壩工力難施以至漸刷漸寬彼
時相度形勢計非大埽長椿萬難期効一面請調
人夫一面分派採辦置買椿檣漸次粗備於七月
內相機進埽彌月方幸底績有期不意八月中旬
異常水勢較前數倍兼之狂風驟雨怒浪衝激東

蟄西陷加以廢堤爲害埽護套壘於萬難救援之中護保兩壩無虞而所備柳料則已費去二十五萬有餘矣及今探量決口尚寬九十六丈水勢深淺不等約計用埽三百五十四箇應用物料除柳草茭蘆本地中椿額募人夫通不計錢糧外而大椿霖蔴二項必須價買至隣省採柳又與本省不同若非量給運脚無以責成恐反遲誤埽椿人夫晝夜勞苦亦必照例酌給工食乃可責以効力據估銀一萬五千七百六十四兩一錢四分五釐本

道再四審度幾經籌計不得不然實亦萬不容已之役也然不動錢糧設處辦集者所省已不下數十萬金矣至欠柳四十一萬二千一百五十三束近地既無可採遠處又難猝至據議於豫省各工就近借用此亦變通之策也伏乞本部院軫念決口重務時日迫促速賜具

題批示下道轉行廳印動支曹庫河銀辦給接濟庶不致臨期停待有誤決工更有請者各官徵夫辦料課督畚鍤無非任勞任怨之事若不立勸懲之

法以鼓勵人心誠恐少有因循必致愆期合無請
乞本部院特賜

題明於工完之日將勸輸柳料并在工勤勞急工者
一體叙錄倘有抗玩膜視懈惰偷安者立行叅處
則勤者益加黽勉而惰者亦知儆惕奮勵以勸驅
策而工程底績有期矣等因冊詳到臣該臣看得
曹縣石香爐決口前此採辦堵塞止餘八丈忽於
五月十五日河汛復長洪流湧射多方搶護僅全
西壩東壩屢經退後挖槽裹護俱被衝失時因伏

秋已迫漲溢無常形勢尚在未定工力總屬徒施
計惟有多積料物俟水勢少平乘時合作臣嚴飭
道廳各官一面措集夫柳守護新堤一面於附近
州縣採運柳草芟槪并預辦椿榦各料迨至七月
終旬事緒漸就遂督官夫次第進埽不意八月之
內烈風霖雨秋漲倍甚不但兩壩已成之工竭力
套壅始幸保固而大溜北創東壩又變頂衝壩後
復受迴溜三面環攻隨護隨墊費料不貲該道廳
等官於九月二十日逐細探估除前下過埽二百

三十五箇現在決口較之七月之前淺者已深深者更倍約仍應用埽三百五十四箇臣於九月末旬自豫回工復經督同親勘委與報估情形無異一應本省所辦柳梢野草中椿芟概就近採運並酌額夫鄉夫通不計錢糧外但糴麻無從採取大椿產自河南必得動銀置買椿手埽夫習藝謀生晝夜勞苦勢須酌給工食并隣省採柳量給運費共估工料銀一萬五千七百六十四兩一錢四分五釐若隣省各官倘果鼓勸有法其間車運價銀

尚可酌量從省惟是黃河南岸柳束船戶挽渡日久無食多致逃散不得不於此數之內每束酌抽給銀四釐以資僱覓水手之費查此工實係大工設辦夫料爲數甚多估費原不及十分之一臣一面批行具

題一面分頭催辦并佈置周詳嚴督官夫晝夜進埽嗣於十月十九日渡河南巡仍又逐節測探大溜歸河漸多沙澱向之深者又復變而成淺其工程錢糧并借動物料似更有可以撙節者總之臨期

相機贏縮俟工完查覈據實

奏銷但鳩集夫料催調車船綜理收支課督工作事
既煩重更極艱辛全賴奉行及調委各官同心協
力勞怨不辭乃能共濟急工尅期底績誠恐無以
勸懲未免易生趨避合無容臣循照往例於工完
日查果効有勤勞題

請叙錄其或怠玩貽誤從重指叅庶群力畢收而決工
可以早竣矣既經該道呈詳前來相應具

題伏乞

勅部議覆施行

康熙元年十一月初八日題本月二十五日奉

旨工部議奏

工部覆前疏

題爲決工水勢倍劇等事工科抄出該本部覆總督
河道朱之錫題前事等因奉

旨工部議奏欽此欽遵抄出到部該臣等看得總河臣
朱之錫疏稱曹縣石香爐決口前此堵塞止餘八
丈不意八月之內秋漲倍甚大溜北倒隨護隨蟄

一應柳草中樁就近採運不計錢糧外但霖蔴大
樁必得動銀置買并工食運價共估工料價銀一
萬五千七百六十四兩一錢四分零看大溜歸河
深者成淺所用物料似更有可以樽節者應令總
河臣嚴加樽節工完覈實具

題以憑覈銷至於調委各官無以勸懲易生趨避於
工完日查果効有勤勞題

請叙錄怠玩者指叅如其所請其本地方專管各官應
不准叙錄可也奉

言依議

河防疏畧

卷之十五

十五

寒香館

三舉申明激勸大典疏

題爲申明激勸大典事案照順治十八年八月二十一日准吏部咨開文選清吏司案呈奉本部送吏科抄出該本部會覆河道朱總督題前事等因順治十八年閏七月初五日奉

旨依議欽此欽遵抄出到部送司相應會同議覆該吏部都察院謹遵

旨會議得總督河道統轄五省屬員頗多與巡撫止轄一省者不同今每年河工告竣所薦官員議定額

數應薦差出部司方面共五員有司十員佐貳四員若逾定額不係管轄之官聽部院叅處所薦之官不准註冊如在定額之內俱准註冊奉

旨之後行令該督照新題定例薦舉可也理合具覆恭候

命下轉行遵奉施行等因順治十八年八月初六日奉旨依議本內漢字首行遺落等衙門着添補飭行欽此欽遵抄出到部移咨到臣遵行在案爲照河屬歲修例應甄別節經

題明奉有

俞旨查順治十八年河防告竣臣先經檄行各屬造報
賢否去後節據各司道冊報前來臣復嚴加檢覈
惟以本年之內著有勞績克濟修防者列之薦剡
以昭鼓勵苟於河政無裨雖別善可稱他端難料
皆臣所不敢贅及也至若溺職各官除聞見所及
陸續

題叅外茲亦查據揭報照例叅處所有應薦官十九
員應劾官四員謹瀝列爲我

皇上陳之

計開

應薦司道官五員

通惠分司工部主事壽以仁疏淺築堤綱
繆克慎受事以來潰溢竟自絕聞輓輸
亦復無阻而督徵河項積逋更爲一清
係通薊道相有度開報

漕儲道叅政黃廷獻數千里河漕殫力督
催抵通特早京口大挑一節奮身獨任

不費帑金而旬日之間空重利涉成勞
尤自難泯係江南右布政使孫代開報
淮徐道叅政項錫胤南黃北泲諸險交湊
區畫旣中肯綮奔馳不憚勤勞而且戢
盜安民催漕剔蠹犖然可紀係中河分
司劉世豸開報

東兗道叅政張弘俊挑濬河渠督催輓運
繕修城郭安輯流離靡不本諸精詳出
以勤敏監司中之表表者係山東左布

政使周天裔開報

河南驛傳道叅政萬永祚駐劄河濱承委
協理三家莊險工勘驗堤埽督飭官夫
不辭勞怨至於挑濬引河捐貲鼓犒尤
足爲同舟之勸係河南左布政使徐化
成開報

應薦有司十員

歸德府知府宋國榮郡屬隄防督飭維謹
承比王家道口柳料如期運解河患賴

以無虞係管河道荆世爵開報

開封府同知韓齊范代攝府篆議額夫則
不辭怨讟派柳料則共服均平澹操實
心一時僅見係守渠道王來用開報

兗州府洳河通判胡一璉疏濬漕渠節宣
閘座靡不勤慎從事南北空重飛輓無
停係夏鎮分司李禧熊開報

兗州府推官余國柱綜覈夫徭剔釐河蠹
包占之弊一清而河務官評更能詳慎

不苟係濟寧道方兆及開報

淮安府推官俞有章淮城各工繁劇摘奸
儆情久著成勞至支給大挑銀兩窮夫
尤沾實惠係署淮海道杜漢開報

曹州知州母配坤編徭旣鮮偏累工食盡
絕漏卮故能奉行徵調趨赴爭先可稱
急公能吏係兗州府推官余國柱開報
單縣知縣韓第隄防河道栽植柳林繕葺
城隍清理夫役事事修舉未易材也係

兗州府推官余國柱開報

商丘縣知縣劉之驥加意河防先勞從事
增修堤壩廣儲柳料未估帑金險工恃
以無恐係管河道荆世爵開報

封丘縣知縣屠粹忠大工河勢變遷無定
鳩辦既能早集董率每必躬親足稱勤
慎係管河道荆世爵開報

安東縣知縣夏時正課督栽柳所在成林
每遇隣封急工徵夫問料獨能先期協

濟係淮安府推官俞有章開報

應薦佐貳四員

濟寧州同知潘得榮供兵辦河才優績著
係濟寧道方兆及開報

鄭州判官王世璽築堤維勤樹柳得法係
管河道荆世爵開報

徐州下河判官王允讚毘勉河防具徵實
效係淮徐道項錫胤開報

封丘縣縣丞錢交叟委管工程勤勞任事

係管河道荆世爵開報以上各官所當
薦揚以備叙錄者也

應劾官四員

鄂陵縣知縣黃雲鶴

一本官怠玩成性十八年派柳一萬三
千餘束一任道催藐視不應

一本官十八年應解協濟額夫二百四
十一名逃去一半屢次催提全不拿
解係管河道荆世爵開報

中牟縣縣丞惠文彥

一本官遇黃練集河患危急泄泄從事
廳印官催呼徒急頑鈍不靈

一本官職司河務情形緩急全然不省
每每失報水汛係南河同知崔維雅
揭報

商丘縣主簿鄭圖南

一本官專管河工遇當春夏水汛之期
高坐私署竟不察視

一本官鈐束無能一任河夫偷安怠惰
屢經察飭係管河道荆世爵開報以
上三官所當照例議處者也

蘭陽縣署管河務教諭郭益善

一本官詐索該縣北岸堡夫八十名每
名銀一錢五分共銀十二兩又詐南
岸堡夫銀一兩零堡夫劉尚節徐思
王珩等証

一本官乘堡夫支領工食銀兩二次扣

銀六兩河書商景輅証係管河道荆
世爵開報此一官者所當照例查究
者也伏乞

勅部再加覆覈如果臣言不謬將壽以仁等酌量叙錄
黃雲鶴等分別議處庶勸懲聿彰河事有賴矣

康熙元年十二月
日題本月二十五日奉

旨吏部知道

呈報石香爐塞決疏

題爲呈報石香爐決口閉合日期事據兗西道魏紹芳呈稱蒙臣票爲

欽工萬分緊急嚴飭料理共效同舟尅期底績事照得石香爐決口幾奪全河雖幸各官晝夜駐工修守保全兩壩但現存口門猶有九十餘丈若不乘此三冬併工閉合轉盼春汛便有不可收拾之勢一應調用各官酌派夫料本部院規畫粗定但長河千里處處告急刻下復擬南巡誠恐各屬怠玩已

經特疏具

題責成該道毋論隔省隔屬俱聽徑自關行提調所
有應行事宜相應逐款開列合行嚴飭爲此票仰
兗西道照票事理卽便振起精神嚴行催督協濟
州縣所有應出夫車柳料各項勒定限期星夜解
運倘有抗誤揭報到院立行叅處並督官夫晝夜
進埽務於歲內報完在事各官事竣之後仍聽該
道分別造報甄叙勸懲該道責任攸關縱有裁併
之議必俟決口塞合方許離任如或因循觀望致

誤歲內限期卽遵部奉前

旨從重指叅斷不寬假慎毋自誤等因蒙此本道遵依
隨照單開五十六款應出夫車柳料等項州縣分
頭差人嚴催并移會江南河南及本省各道協催
外本道專驅河干晝夜督夫下埽決口告竣今於
正月十七日合龍門訖且以本職自奉本部院
嚴檄之日河口九十餘丈水深者五丈餘或四丈
或二三丈不等不出一月之內而龍門閉合雖曰
各官勤勛人夫効力埽料駢至所致實賴

朝廷洪福本部院至誠感格因而河伯效靈是以成
功若斯之速也除將河工應行事宜移送濟寧道
督理外所有各官勞苦埽料數目另容清冊詳請
本部院裁度可也擬合先行呈報等因又據兗州
府管理運河同知王有容署兗州府黃河同知事
單縣知縣韓第兗州府管理洳河通判胡一璉各
將閉合龍門日期呈報到臣該臣看得石香爐一
工自五月初旬報決臣卽駐宿河干嚴督搶塞無
奈水勢方盛裹頭大埽屢被衝失於是一面幫築

全堤一面催辦各料定於七月十五日兩壩進壩
漸有頭緒不期秋分以後漲水非常全河入決口
者以十之八臣徬徨憂迫日則廢箸夜則遶床蓋
未嘗一刻敢自寧處也猶幸官夫鼓勸於風雨晦
冥之中套壓搶救兩壩保全得以廣集夫料晝夜
兼工據報已於十一月十七日閉合龍門訖初計
決口寬至一百六十丈淺者丈餘深者甚至四五
丈不等如此大役未幾告成此皆

朝廷洪福運道生民之厚幸也而在工各官酷暑隆

冬任勞任怨半載苦績要亦有不可泯者除善後事宜臣已備行道廳悉心勘畫併用過物料錢糧及督工辦料各官通俟覈明另

題外所有石香爐口閉塞龍門日期既經各道廳呈報前來相應題

報伏乞

睿鑒施行

康熙元年十二月十五日題本月二十八日奉

旨工部知道

河防疏畧卷之十六

義烏朱之錫梅麓甫著

稽山後學徐 沁埜公輯

特叅庸劣廳官疏

題爲特叅庸劣廳官以重河防事竊照山清河道西
有高堰裏河東有王公堤天妃壩太行堤五大險
工上關

國計下係民生設有山清同知一官分署此地責綦
重矣况該屬自去歲洪水非常雖一時搶救幸未

成患然創殘之後工作倍繁除應估工程屢催估
修外至高堰浪窩損缺例有額夫不時填補太行
老堤二百餘里舊堤卑薄原應民夫分界加幫臣
嚴檄申飭不啻再四乃山清同知林廷萊歷任將
及一載河務尚爾茫然今時將仲夏前項工程尚
無頭緒伏秋轉瞬漲發有期該廳專駐淮潁一味
因循旣無籌畫之能復鮮督催之術河防重計又
安賴此廳官爲哉况該廳管理河帑出納攸關亦
斷非若此泄泄弛玩之人所能勝任而愉快也除

山陽各工臣一面頒發

令旗檄調南河分司移駐督理外所有庸劣廳官相應特疏

題叅伏乞

勅部議處施行

康熙二年四月二十四日題五月初八日奉

旨林廷萊着議處具奏該部知道

覆秋水汜濫異常疏

題爲秋水汜濫異常各官告急接踵微臣目擊情形
謹據實報

聞仰祈

睿鑒事康熙元年十一月二十四日准工部咨工科抄
出該本部覆漕運林總督題前事等因康熙元年
九月二十二日題十月十四日奉

旨該部議奏欽此欽遵於十月十五日抄出到部該臣
等看得總漕林起龍疏稱秋雨連綿黃淮交漲洪

水狂發堤岸衝決除嚴加申飭令其加緊堵築並
咨總河臣備料搶修外仰祈

勅下河臣轉行所屬印河各官一遇危急險工需用物
料准其備辦搶修事後開銷等因具

題前來查得淮徐一帶水汛先據總河臣朱之錫具

疏題

報已經臣部題覆遵行在案相應仍請

勅下總河臣嚴飭司道等官親駐河干相機搶救如遇
危急處所一面動支錢糧修造一面將應用錢糧

確估具

題至疏稱季家堤等處衝決其決口遠行堵塞仍查明具

題可也等因康熙元年十一月初四日題初六日奉旨是依議行欽此欽遵抄出到部移咨到臣隨行淮揚司道相機搶修查明具報去後續據中河分司劉世豸署淮海道事淮徐道項錫胤會詳內稱遵依率廳河官上下查勘去歲徐屬城堤郭家嘴小店三險俱奉估修工程值秋水盈溢皆修築如式已

具詳冊請銷至靈璧縣睢寧之清水口武官營孟
家灣邳州之董家堂五工頭青墩營孫家灣張家
莊郭家灣及宿遷之直河去歲滔天之水處處危
險在在告急本司任立風雨率夫搶救俱保無虞
除

題估工程已經呈詳報銷外水落之後原無衝決間
有殘缺處所已修補一律並未動用錢糧若季家
堤卽桃源之季太壩也查桃源北岸明季隆萬以
前原無堤防自崔鎮決而黃河北徙隨致運道淤

塞前總河潘部院題築遙堤自古城起至清河止
一萬八千四百一十丈而河歸故道與淮水交匯
又慮淮揚勢處窪下南河諸湖之水會歸達淮每
至伏秋淮黃交漲黃逼清流不得東出湍激之勢
汎濫衝潰一傾瀉於高澗周橋再澎湃於高堰又
湧注於通濟閘則高寶淮城與淮屬之漕堤民生
甚爲可虞故審時度勢於遙堤之內建設崔鎮徐
昇李太三義四壩旣洩瀑漲之水又無奪河之患
且東流入海皆有故道可尋當時遙堤旣建而必

岌岌築壩者以淮揚一帶所關至重且大也查萬曆七年十月內科道會勘得遙堤旣建水歸正漕田廬可免水患但恐異常之漲河水盈溢故復設此減水壩於遙堤之中以便分殺且無衝潰遙堤之患季太徐昇三義三壩之義皆同而俱設北岸者以其從灌口入海也又於順治十六年間蒙本部院票查四壩應修築月堤緣由該前任分司李縉明淮海道霍炳會呈修築石壩非一時可以興舉合無先築月堤以爲目下救濟急着隨於十七

年間爲淮屬黃河異常水患事蒙本部院具

題部覆在案去歲水漲仍由故道入海原非決口隨
蒙本部院行查已於元年十月二十九等日將季
太等壩次第築完呈報訖但查四壩水發聽其宣
洩水落仍歸正漕相沿已久今一旦堵塞恐難免
潰溢之患欲照舊修復不惟帑藏不敷辦運維艱
而工大費繁又非旦夕可以責效今據廳縣詳稱
該縣士民夏則大等議改建涵洞四座每座金門
濶六尺高八尺其應用椿石磚灰等項該縣設處

不計錢糧查涇洞之制廣狹雖不及石壩但使修築堅實不爲草率再查一帶遙堤有單薄淺缺築高厚而洞口緩流亦可分殺瀑漲亦不致瀰漫湮沒全河之勢上源旣減卽下而清口又免壅聚逞怒之害安上全下不費公帑民自修築况工少易成雖因陋就簡名異而實同也等因又據南河分司吳煒署淮海道事淮徐道項錫胤揚州道杜爽會詳據淮安府分管山清河務同知林廷葵回稱查得康熙元年自春至秋黃淮并漲水勢洶湧

日甚一日各工告險處處皆同卑職所轄山清二縣境內河道工程陡遇秋深洪水違時泛漲異常危險在在堪虞間有坍塌處所卑職同司道露宿河干晝夜設法搪護保固無虞并無衝決亦未動用官帑等因又據揚州府管河通判周道東回稱看得江都縣境內閘座修造年久昨被洪水衝汕今已設法修築未動錢糧又高郵州城南缺口俱係土堤從未估修因去歲洪水泛漲高過堤岸以致衝卸當卽設法築完亦未動用錢糧案查各堤

岸係從來未經估修之處奉本司責令該州縣起
派人夫加幫填築並無動用錢糧等因各報到司
據此該司道會看得客歲淮黃并漲黃運兩河堤
岸開座處處危險至秋洪水陡發淮揚竟成澤國
一望汪洋無可收拾該司道督同廳印河官駐宿
河干晝夜防護設法搶救保固無虞並未動用錢
糧今蒙前因擬合回報各等因到臣該臣看得去
歲百川交漲秋分以後其勢益甚臣往來奔馳未
常停踵仍分發差檄責成司道等官多方搶救幸

徐邳淮揚歲修各工保固無虞見在查覈

奏銷其有堤岸殘缺俱已修補一律而高江缺口乃從未估修之處亦皆鼓勵搶築並未估計錢糧臣仍於續報淮揚水汛疏內查明另行具

題外至總漕臣林起龍疏內所稱李家堤等處決口查宿遷古城以下於前明萬曆年間始築遙堤一萬八千四百一十丈至清河縣大河口止仍於桃源縣境內連造崔鎮徐昇季太三義四壩宣洩漲水既以保固遙堤而先分黃怒亦可少減下流水

患順治十六年黃水漲溢曾由此壩旁分入海嗣
准部咨行查臣行據司道以壩基雖存舊石俱毀
興復未易止議暫築月堤水溢聽其分殺水消仍
行補修該臣具

題部覆奉

旨依議在案去歲水勢較前倍盛是以復由各壩入海
非係決口水勢消落隨該司道集夫補築臣亦於
續報淮揚水汛疏內

題明矣第恐以前人洩水舊壩一槩堵塞反滋後患

復行司道從長酌議據稱姑循輿論改建涵洞四座應用各料該縣設處不計錢糧臣已批行司道嚴督建修至於修復舊壩俟民力稍充另行酌估既經司道會議詳報前來相應具

題伏乞

勅部議覆施行

康熙二年五月初五日題本月二十日奉

旨工部知道

工部覆前疏

題爲秋水氾濫異常等事工科抄出該本部覆總督河道朱之錫題前事等因奉

旨工部知道欽此欽遵於五月二十一日抄出到部該臣等案查先據總漕臣林起龍疏報淮揚水汛內稱季家堤等處衝決隨經臣部請

勅總河臣將決口速行堵塞仍查明具

題等因行文在案今據總河臣朱之錫疏稱季家堤等處決口查宿遷古城以下於萬曆年間始築遙堤內建崔鎮等四壩宣洩漲水去歲水勢較前倍

盛是以復由各壩入海非係決口第恐前人洩水
舊壩一槩堵塞及茲後患據議改建涵洞四座應
用各料該縣設處不計錢糧臣已批行司道嚴督
建修等因具

題前來查季家堤等處既經總河臣稱係舊壩原非
決口此案相應註銷至於改建涵洞相應如議可
也奉

旨依議

題補山清同知疏

題爲循例

請補管河廳官以重運道民生事竊照治河一事節序相催旣不可以刻廢修防異致又未可以漫嘗故管河廳官必於就近有司選擇

題補然後可以倚辦分猷無誤重計臣於順治十六年正月內曾具有慎重河工職守事一疏該吏部議覆內開河臣疏稱薦用一欵內稱除道印各官不係專司者不敢薦用外伏讀

勅書內開所屬大小官員果能盡心河務卽指實薦舉
擢用似應題請照例遵行等語查得臣部於順治十
年十二月內覆河臣楊方興就近請補廳官毋誤
黃運兩河事一疏以鉅野知縣佟養鉅補運河同
知定陶知縣張鍾英補黃河同知奉

旨依議在案如河臣所屬河官有能盡心河務者相應
照例題請

勅下臣部議覆請

旨補用奉

旨依議欽此欽遵移咨到臣在案今照淮安府屬山清河道東有太行老堤五大險工西有高堰北有王公堤天妃壩等工是皆歷來名險要害旣關漕運咽喉而七邑生民兩淮鹽課無不於此焉攸寄原任山清同知林廷萊庸劣因循臣已特疏

題叅奉

旨議處所遺員缺若專候部選不但生手未諳且赴任無期懸缺以待未免貽誤臣與總漕鳳撫二臣互相商確查得寶應縣知縣王全春由拔貢於順治

河防疏畧

卷之十六

十三

寒香館

十一年六月內授職本年十月內到任才幹勤敏
頗著成勞臣於十七年歲終舉劾曾經

題薦河工旣所素曉歷俸又稱最深以之就近

題補則朝拜

命而夕受事有裨運道民生良非淺鮮臣謹會同總漕
臣林起龍鳳撫臣張尚賢合詞循例具

題伏乞

勅部議覆施行

康熙二年六月十三日題本月二十六日奉

旨吏部議奏

吏部覆前疏

題爲循例

請補管河廳官以重運道民生事文選清吏司案呈奉
本部送吏科抄出該本部覆河道總督朱之錫題
前事等因奉

旨吏部議奏欽此欽遵抄出到部該臣等查得順治十
六年三月內臣部覆河臣朱之錫慎重河工職守
一疏內如河臣所屬河官有能盡心河務者相應

題請

勅下臣部議覆請

旨補用奉有依議之

旨欽遵在案查淮安府屬山清同知林廷萊員缺臣部
於二年六月內推陞四川順慶府通判秦生鏡今
河臣朱之錫會同總漕林起龍鳳撫張尚賢以寶
應知縣王仝春才幹勤敏頗著成勞擬陞山清同
知前來查王仝春於十一年十月十一日到任迄
今歷俸連閏八年十一箇月有餘任內有薦二次

紀錄六次應如所請陞補寶應縣任內錢糧查無
拖欠方許赴新任其陞補同知秦生鏡已經奉
旨相應扣憑另行籤補可也奉

旨依議

題叙石香爐勤勞各官疏

題爲決工水勢倍劇物力措處維艱請祈速賜酌估
以無誤堵塞事康熙元年十二月二十六日准工
部咨工科抄出該本部覆河道朱總督題前事等
因康熙元年十一月初八日題本月二十五日奉
旨工部議奏欽此欽遵於十一月二十六日抄出到部
該臣等看得總河臣朱之錫疏稱曹縣石香爐決
口前此堵塞止餘八丈不意八月之內秋漲倍甚
大溜北倒隨護隨蟄一應柳草中樁就近採運不

計錢糧外但絲麻大椿必得動銀置買併工食運
價共估工料價銀一萬五千七百六十四兩一錢
四分零看大溜歸河深者成淺所用物料似更有
可以撙節者應令總河臣嚴加撙節工完覈實具
題以憑覈銷至於調委各官無以勸懲易生趨避於
工完日查果効有勤勞題

請叙錄怠玩者指叅如其所請其本地方專管各官應
不准叙錄可也等因康熙元年十二月十三日題
十五日奉

旨依議欽此欽遵抄出到部移咨到臣除抗誤人夫勝
縣知縣李含葢先經特疏指叅併工程錢糧另疏
奏銷外今據濟寧道方兆及備將勤勞文武各官造
冊呈詳到臣該臣看得黃河塞決僅以區區人力
爭衡於怒濤洶浪之中風雨奔馳實爲艱苦故順
治四年塞流通八年塞汴口十四年塞大王廟俱
有分別

題叙之例蓋非特以酬其既往正以爲不如是則將
來緩急無以作任事之氣而收底績之功耳曹縣

石香爐一工決口寬至一百六十丈大溜北徙幾
奪全河夫料繁多頭緒錯出臣調委各官晝夜經
營備極勞瘁前於估工疏內曾經題

請容俟工完叙錄以示鼓勵部覆奉

旨依議在案賴

國家景福決口甚大水勢倍常而河帑之所費無多
龍門之告成甚速在事各官殫心協力克効勤勞
實有未可盡泯者今據該道開報到臣除覈西道
魏紹芳曹縣知縣陳澄心主簿陳方原係該管併

濟寧道方兆及署黃河同知事單縣知縣韓第均有分內責成未敢叙列外查有應叙者運河同知王有容黃河工程原非專職本官一經承委露宿河干酷暑祈寒不辭勞怨催運柳料而源源不匱調度官夫而井井有條自始歷終堵塞之功可稱獨最其餘文武各官奔走分任實繁有人臣其嚴其慎不敢濫及止擇其勤勞尤著者共八人遵照舊例開列具

題聽部查叙至各州縣協濟採柳六十六萬餘束計

笑漕規值銀頗多州縣各官急公之績均有足尚
應否一體叙錄統候部議相應具

題伏乞

勅部議覆施行

計開

徐州營副將周貴南岸柳東渡運艱難本官
覓解中船一百隻深賴濟急

兗州府經歷宋濬經收柳束百萬有餘備極

勞勩

商丘縣縣丞陳士性親督人夫採運柳枝淪
溺不避

臣標左營千總陳鑄守催劉家口車船裝運
柳束保全東壩

臣標中營千總楊璠催辦懷慶府大椿尅期
運工接濟不匱

漕標効用官孫應禎總漕臣特委催採豐碭
兩縣柳束完解獨先

東平州吏目李蘭馨經支柳束數目清楚暑

雨忘勞

沛縣王簿黃志督採椿楸不下數千緩急無
誤

曹州知州母配坤協濟大柳十三萬五千四
百九十束照依漕規每束值價銀五分
共值價銀六千七百七十四兩五錢

單縣知縣韓第協濟大柳九萬七千三百八
十八束照依漕規每束值價銀五分共
值價銀四千八百六十九兩四錢

定陶縣知縣馬之瑛協濟大柳六萬五千束
照依漕規每束值價銀五分共值價銀
三千二百五十兩

鉅野縣知縣耿禎協濟大柳三萬五千九百
零三束照依漕規每束值價銀五分共
值價銀一千七百九十五兩一錢五分
嘉祥縣知縣方學舜協濟大柳一萬三百四
十九束照依漕規每束值價銀五分共
值價銀五百一十七兩四錢五分

鄆城縣署卽濟寧州同知潘得榮協濟大柳
一萬五千束照依漕規每束值價銀五
分共值價銀七百五十兩

城武縣知縣王素臣協濟大柳二萬八千一
百六十束照依漕規每束值價銀五分
共值價銀一千四百零八兩

河南商丘縣知縣劉之驥協濟大柳十五萬
束照依漕規每束值價銀五分共值價
銀七千五百兩

夏邑縣知縣張光烈協濟大柳三萬四千三百八十四束照依漕規每束值價銀五分共值價銀一千七百一十九兩二錢
考城縣知縣趙日采協濟大柳三萬束照依漕規每束值價銀五分共值價銀一千五百兩

江南署豐縣印沛縣知縣郭維新協濟大柳四萬八千八百六十四束照依漕規每束值價銀五分共值價銀二千四百四

十三兩二錢

碭山縣知縣林雲鑲協濟大柳一萬六千四百三束照依漕規每束值價銀五分共值價銀八百二十兩一錢五分

康熙二年六月十五日題七月初一日奉

旨該部知道

覆續報淮揚水汛疏

題爲續報淮揚水汛事康熙二年二月初七日准工部咨工科抄出該本部覆河道朱總督題前事等因康熙元年十二月十五日題本月二十八日奉旨工部知道欽此欽遵於正月初四日抄出到部該臣等看得總河臣朱之錫疏稱缺口六處已經築完今歲百川交漲所在汪洋淮揚以澤國而當此洪水危急之勢更非尋常臣於十月十九日星馳南下沿河一一親勘堤岸閘座多被創殘除臣嚴行

司道各官詳加勘度預計修築外所有勘過淮揚水勢情形相應題

報等因前來查得缺口六處雖稱築完係何年做過工程有無需用錢糧係何官做過者並未說及又堤岸閘座多被剝殘某處係某年做過現今某處需用錢糧若干未經

題估徑行司道各官勘度預計修築殊屬不合相應請

勅總河臣逐一查明具

題再議可也等因康熙二年正月二十七日題二十

九日奉

旨依議欽此欽遵抄出到部移咨到臣備行該司道確
查去後今據南河分司吳煒揚州道杜漢會詳據
揚州府管河通判周道東呈據高郵州申稱查得
城南五里壩八里鋪地方坍卸缺工五處俱係年
久土岸從未估修因去歲淮黃交漲高過堤岸不
時西風大作根腳酥軟以致漫卸當該前任吳知
州督同河官設法築完未動官帑擬合回報又據

江都縣回稱該卑縣查得境內露筋頭淺減水二
閘一座造自順治六年迄今一十五載因元年分
被洪水衝汕隨該前任熊知縣督同翁主簿設法
修築完固並未請動錢糧擬合回報各等因到職
據此擬合轉報等因到司據此該司道會看得客
秋淮黃併漲堤岸閘座無不受傷民舍田廬皆爲
澤國一望汪洋難以收拾該本司督同廳印河官
駐宿河干率領額夫晝夜防護當經設法搶修保
固無虞并未動用錢糧照蒙前因擬合具詳轉報

等因到臣該臣看得去歲水勢異漲南北湖河內
外交攻不特土堤埽箇悉被衝蝨卽磚石厓岸亦
無一處不漫激欹卸臣往來奔馳分檄責成司道
等官拮据搶救幸未成患而揚屬一線漕堤兩面
巨浸兼之地勢窪下雖東堤一帶洩水閘洞盡皆
開通無如水頭日長西風大作沿堤而過除先經
塘禦外水落之後仍有缺口六處旋即補築臣隨
具疏題

報嗣准部咨復行司道確查據稱高郵州城南五里壩

八里鋪地方缺口五處係年久土岸從未估修江
都縣露觔頭淺減水二閘係順治六年修過年久
衝汕缺口一處俱經該州縣印官多方鼓勸設備
料物修築完固並未動用錢糧至堤岸閘座多被
創殘豫東江南所在而然非止一處臣閱歷所及
少有損動隨卽飭行修補但歲修工程每於秋冬
猶必通行勘估况當大創之後來年之計更宜早
籌臣是以嚴檄司道各官勘度預計免致後時其
間設處夫料工程臣卽批行償修無煩

題估倘需用錢糧繁多自必據冊具

題仍於工完覈實

奏銷此俱現行事例雖修防機宜原無一定臣未敢
膠執成見貽誤重計而事干錢糧必嚴必慎自亦
不敢容其紊越也除本年歲修各工仍俟司道估
計詳冊至日次第具

題外所有查明揚屬缺口六處并堤岸間座未動錢
糧緣由相應具

題伏乞

勅部議覆施行

康熙元年十二月十五日題本月二十八日奉

旨工部知道

題補北河同知疏

題爲循例

請補管河廳官以裨修防重計事准河南督臣劉清泰
咨爲咨商事准總河部院咨開照得開封府黃河
南北兩岸均屬險要而北岸關係運道尤爲喫緊
一切修防惟廳官是賴今北河同知王鎮已經陞
任所遺員缺若候部推不但才品難料且恐赴任
無期貽誤匪細必得明敏練達曾經料理河工之
官方克有濟又必須俸序相當身無詿誤方可就

近

題補刻期受事本部院遠在東省見聞未周督撫部
院駐節伊邇藻鑑尤確相應咨商煩爲查照希賜
酌定某官堪副此選察其履歷俸序無有妨碍者
咨復過院以便會

題施行等因到部院准此爲照總河部院藻鑑衡空
更以虛衷采訪本部院自當悉心相告以副來問
也今查開封府推官于紀龍負才明達遇事勤劬
當去歲天雨連綿河水大發本官曾隨撫院查河

卽暑雨不憚更能於緊要修防處所指授中竅不辭勞瘁本官勤敏之才於斯見矣且奉委查河於河工機宜利弊素諳胸中以之補授此缺則人地似乎相當可否

題補惟總河部院酌裁行之可也相應咨覆等因到臣又准河南撫臣張自德咨開准總河部院咨同前事准此爲照北河要缺應補河員旣承總河部院虛已下商敢不悉心籌畫據實選舉以仰副總河部院爲地擇人之至意哉今查開封府推官于

紀龍人旣勤劬才復明敎去年六月內隨本院查河至步李寨劉家店等處非惟不避風雨不憚勞瘁尤能於修守搶救處指授中竅波濤泥濘中催督靡懈至於八月十四後雨大河發水與杞縣堤平本院力督官民躬冒風雨防守幫築者十五六晝夜人皆疲倦不堪惟本官日夜周張始終如一則杞之不致淪沒者得本官之力居多且本官四載司理數委查河所以於河上機宜知之最悉河工利弊知之最詳若以此官改補此缺品秩旣以

相當時事不致稽誤人地之宜未有宜於此者也
至應否

題補是在總河部院裁酌擬合咨覆等因到臣該臣
看得管河廳官選擇

題補臣於順治十六年正月內具有慎重河工職守
一疏該吏部覆奉

俞旨備經遵行在案頃臣接閱邸報開封府北河同知
王鑛已經陞任員缺尚懸竊惟黃河大勢湍悍奔
放中州爲甚而北岸數百里稍有疎虞卽關運道

河防疏畧

卷之十六

七

寒香館

通塞一切修防尤非其他河官可比非得明敏諳練之人斷未易以任臂指而緩急克濟也誠恐專候部選不但赴任無期抑且才具難料河工重計貽誤可虞臣移咨該省督撫二臣詳慎商確查有開封府推官于紀龍才幹素優任事勤敏去歲黃水異漲之時曾經在工協同修守深悉河務據本官已陞建寧府同知尚未離任以之就近題

請留補品秩既已相當人地亦復允愜所有建寧員缺另聽銓除雖北河同知一官最稱勞苦然臣等爲

官擇人不暇計其私便也臣謹會同督臣劉清泰
撫臣張自德合詞循例具

題伏乞

勅部議覆施行

康熙二年八月初三日題本月二十六日奉

旨吏部議奏

吏部覆前疏

題爲循例

請補官河廳官以裨修防重計事文選清吏司案呈奉

本部送吏科抄出該本部覆河道總督朱之錫題
前事等因奉

旨吏部議奏欽此欽遵抄出到部該臣等查得順治十
六年三月內臣部覆河臣朱之錫慎重河工職守
一疏內如河臣所屬河官有能盡心河務者相應
題請

勅下臣部議覆請

旨補用奉有依議之

旨欽遵在案查開封府推官于紀龍已陞福建建寧府

同知開封府屬北河同知王鑽員缺已經陞浙江
杭州府錢塘縣知縣慕天顏但該督疏稱開封府
推官于紀龍才幹素優任事勤敏去歲黃水異漲
之時曾經在工協同修守深悉河務相應如其所
請已陞北河同知慕天顏改爲建寧府同知于紀
龍改爲北河同知俟

命下之日另行給憑可也奉

旨依議